

四庫全書

集部

欽定四庫全書

御定歷代題畫詩類卷十目錄

山水類

書王定國所藏煙江疊嶂圖 宋蘇軾

讀東坡疊嶂圖 宋張九成

秋煙疊嶂圖 元劉因

朱元章雲煙疊嶂 元劉因二首

題趙子昂疊岫圖 元戴表元二首

題煙江疊嶂圖

元王惲二首

題錢舜舉畫煙江疊嶂圖

元蒲道源

趙松雪重江疊嶂圖

元鄧文原

陸探微層巒曲鵑圖

元鄧文原

題顧善夫所藏張僧繇畫翠嶂瑤林圖

元鄧文原

題子昂長江疊嶂圖

元虞集

松雪老人臨王晉卿煙江疊嶂圖

元柳貫

題高尚書藤紙畫雲林煙嶂圖

元柳貫

張僧繇翠嶂瑤林

元吳鎮

陸探微員嶠仙游

元吳鎮

陸探微層巒曲隴

元吳鎮

趙松雪重江疊嶂

元吳鎮二首

為松瀑黃尊師作溪山疊翠圖

元馬臻

題朱孟辯層巒曲隴

明貝瓊

書雲林畫林亭遠岫

明呂敏

題煙波疊嶂圖

明李暉

題趙松雪重江疊嶂圖

明陳敬宗

趙松雪長江疊嶂圖

明吳寬

題谿山疊翠卷

明唐寅

趙松雪重江疊嶂圖

明陳鑑

為王元美題王晉卿煙江疊嶂圖

明張鳳翼

題王晉卿煙江疊嶂圖蘇子瞻歌

明王世貞

趙松雪重山疊嶂圖歌

明王世貞

雲林生畫林亭遠岫

明顧敬

寄題台州倅廳雲壑

宋樓鑰

題高彥敬煙嵐圖

元程鉅夫

李咸熙翠巖流壑圖

元黃公望

雲峯圖

元袁桷

題雲崖圖

元傅若金

郭天錫雲岫圖

元吳師道

題白府判仲謙所藏錢舜舉巖壑圖

元劉詵

為鄧靜春作幽谷圖

元朱德潤

為唐景玉畫丘壑圖

元倪瓚

趙元畫懸崖圖

明楊基

題江岫圖

明張紳

題雲門翠微深處

明僧大圭

題趙叅所收趙令穰大年煙林

宋張耒二首

題黃華江皋煙樹

金雷淵二首

題煙波雲樹圖

元丁復

寄謝方方壺寫寄遙山古木

元成廷珪

高彥敬遠山木石圖

元袁桷二首

題青山碧篠圖

元吳鎮

題溪山煙樹圖

明謝廷柱

雲山煙樹圖

明唐寅

題遠峰卷

明陸深

御定歷代題畫詩類卷十目錄

欽定四庫全書

御定歷代題畫詩類卷十

山水類

書王定國所藏煙江疊嶂圖

王晉卿畫

宋蘇軾

江上愁心千疊山，浮空積翠如雲煙。
山邪雲邪遠莫知，煙空雲散山依然。
但見兩厓蒼蒼暗絕谷，中有百道飛來泉。
縈林絡石隱復見，下赴谷口為奔川。
川平山開林麓斷，小橋野店依山前。
行人稍度喬木外，漁舟一葉江

吞天使君何從得此本點綴毫末分清妍不知人間何
處有此景徑欲往置二頃田君不見武昌樊口幽絕處
東坡先生留五年春風搖江天漠漠暮雲卷雨山娟娟
丹楓翻鴉伴水宿長松落雪驚醉眠桃花流水在人世
武陵豈必皆神仙江山清空我塵土雖有去路尋無緣
還君此圖三歎息山中故人應有招我歸來篇

讀東坡疊嶂圖有感因次其韻

宋張九成

虬鬚英武喧天淵當時功臣畫凌煙漢家驍騎才三萬

北攻稽落書燕然勲名鼎鼎磨星斗百年衰落歸黃泉
人間凡事都如夢不如挂冠神武尋山川我昔曾登會
稽頂超遙疑在羲皇前下觀濤江卷飛雪旁看秦望森
摩天祖龍定是同鮑臭鴟夷却得攜妖妍悠然會意不
復出荷鋤便欲耕春田君不見淵明歸去傳圖畫伯時
妙手垂千年我藏東絹今拂拭正欲寫此春江浩渺山
連娟更要元龍湖海士百尺樓中相對眠玉京蓬島置
勿問人間今是地行仙岷江寥寥三峽遠此心欲往知

何緣煩君斷取來方丈徑入東坡疊嶂篇

秋煙疊嶂圖

元劉因

不傳者死不亡存滅沒天機尚有痕曾向煙霏見真態
依然猶是畫家魂

米元章雲煙疊嶂圖

二首

元劉因

筆勢相傳是阿章短屏山影露微茫苦心只辦雲煙好
不抹人呼作米狂

煙影天機滅沒邊誰從豪末出清妍畫家也有清談獎

到處南華一嗒然

題趙子昂疊岫圖

二首

元戴表元

百折雲顛路儘通
無名怪木淡書空
相逢無問秋江客
不是巴中是剡中

白石青林底處無
侵雲亦有小屠蘇
林花飛盡不歸去
揮汗江城看畫圖

題煙江疊嶂圖

二首

元王惲

楚水吳山萬里秋
風帆吹飽北來舟
應憐滿眼新亭客

金少昌
卷十
空對江山雙淚流

江上晴嵐萬疊山幾緣亡國帶愁顏而今一統無南北
滿意風煙送往還

題錢舜舉畫煙江疊嶂圖

元
蒲道源

江山奇絕吳楚鄉畫史又與生錢郎錢郎下筆得天趣
意象髣髴開衡湘浮空水光接巨浸隔岸嵐翠摩穹蒼
幽巖梵宮半隱見老樹樵舍相迷藏中流一葉泛小艇
遠澗千尺橫修梁山居熙熙自太古下視擾擾徒奔忙

我來京國行九軌塵土眯目鬚蒼黃困餘偶作林壑夢
歸計未遂驚彷徨明牕豁然看此畫便覺胸次生清涼
何時挈舟徑成往長嘯振衣千仞岡

趙松雪重江疊嶂圖

元 鄧文原

東風江上柳初團海燕飛飛杏雨寒帆影亂催人去遠
煙光遙映嶂為攢鶯啼幾處邨方市犬吠千家客正餐
滿目溟濛無著處一林鐘磬落潮湍

陸探微層巒曲隄圖

有序

元 鄧文原

善夫過訪出示探微妙筆不勝驚訝漫賦若此以識
奇觀

勾吳山水素稱奇箇裏神工已得之山翠却從林外出
水深常遶屋東澌雞鳴竹里人何處犬護柴門客正炊
一段風煙誰曾得避秦當日自相宜

題顧善夫所藏張僧繇畫翠嶂瑤林圖

元 鄧文原

善夫夙有耽奇癖珍祕何須羨賈胡徽廟未銷當日字

僧繇仍見昔年圖
千林歷落人煙密
萬里縈迴鳥道孤
幾欲臨風試題句
恍疑身世在冰壺

題子昂長江疊嶂圖

元虞集

昔者長江險能生
白髮哀百年經濟
盡一日畫圖開僧
寺依稀在漁舟浩
蕩回蕭條數根樹
時有海潮來

松雪老人臨王晉卿煙江疊嶂圖歌

元柳貫

君不見帝堦王家
寶繪堂山川發墨
開洪荒重江疊嶂

詩作畫東坡留題雲錦光又不見後身松雪齋中叟伸
紙臨摹筆鋒走樓臺縹緲出林坳蘆葦蕭騷藏澤數白
雲飛不盡青冥百丈牽江入樊口墨花照几射我眸我
為寒芳歌遠遊胸中是物有元氣世上何所無滄洲我
疑此叟猶未化瞬息御氣行九州五山四溟一觴豆瑣
細弗遺囊楮收故能援毫發天藻不與俗工爭醜好楚
山雲歸楚水流萬里秋光如電掃拈來關董散花禪別
出曹劉斲輪巧披圖我作如是觀毛穎陶泓共聞道嗚

呼相馬亦相人駕駘豈得同祥麟舍夫毛骨論形似如此鑒賞焉能真後來有問延祐脚意索舉似吾方歎

題高尚書藤紙畫雲林煙嶂圖

元柳貫

髯翁昔飲西湖淥滿意看山看不足醉拈官紙寫秋光
割截五州雲一幅吾聞妙畫能通仙此紙度可支千年
祇愁蓬萊失左股六鼇戴之飛上天

張僧繇翠嶂瑤林

元吳鎮

前峰突兀後峰攢萬木彫殘景色闌仙館無人清磬杳

瑶蹊有客碧蘿寒一縑點染空青遠六法精深秀色團
寄語故人珍襲處僧繇還屬畫中看

陸探微員嶠仙游

元 吳 鎮

梅閣重重翠繞遮時時雲氣颭平沙千峰樹色藏朝雨
百道江聲送晚霞洞古數留仙子蹟溪迴深護羽人家
遨遊每憶無塵地咫尺仍堪閱歲華

陸探微層巒曲隴

元 吳 鎮

六法斯圖見神奇指掌分萬峰凝翠靄一水弄清紋樹

密猿啼苦橋迴鳥喚羣溪邊有茅屋處處挂斜曛

趙松雪重江疊嶂

二首

元吳鎮

江色千重碧煙光無限青數峰橫翠黛一逕入層局倚
市柳為幄迎人花自馨征帆遙點點漁唱起滄溟

摩詰詩無畫斯圖若比肩江深煙浪接山出曉雲連柳
市疎鐘斷花林青旆懸鷗波風月好瞻對使人憐

為松瀑黃尊師作溪山疊翠圖

元馬臻

平生固多愚懶惰足棄捐賴有詩畫事與物相磨研恨

無鵝溪絹幽意鬱不宣秋晚形神清落筆且周旋尺素
混太古象具剖闢先溪山忽重疊浩思浮雲煙樓觀金
碧開衆態數幽妍秋色挾以至高風生樹巔羣有備一
幻孰謂理不然老耳厭喧卑但覺靜所便幸遇古君子
締此翰墨緣見山有真意淵明得其全

題朱孟辯層巒圖

明
貝瓊

疊嶂何崔嵬遠近皆可數不學王宰遲棄墨如棄土林
藏風雨急石戴冰雪古初疑造化鍾已覺精靈聚遙思

兩山下流泉細通圃茅屋今何如人去苔生戶

書雲林畫林亭遠岫

明 呂 敏

憶過梁溪宅于今向廿年賦詩清閼閣試茗惠山泉夜
雨牽離夢春雲黯遠天鄉情與離思看畫共茫然

題煙波疊嶂圖

明 李 暄

憶昨扁舟上南斗順風看山如馬走前山在眼後山失
紫翠繽紛落吾手當年見山如畫圖畫圖得似當年無
臨軒把翫笑絕倒蚤覺詩思生江湖江風蕭蕭煙水暮

盡是漁翁釣魚處安得身輕如白鷗江上飛來又飛去
冷泉亭子深且幽我昔杖履曾追遊山中正當朝雨霽
坐聽泉水涓涓流初如松風灑萬壑忽如仙佩鏘鳴璆
又如蛟龍起潭窟霹靂閃電摧林丘黃猿抱子挂秋影
良久不下聲啾啾是時同行四五人相對毛髮寒飈飈
乃知福地難久住却載酒壺登綵舟故鄉一別幾十載
江湖浪迹如沙鷗風塵瀕洞箭滿眼欲歸洗耳嗟何由
飛來山色入我夢碧松丹桂枝相樛每逢泉石必宿留

題詩感慨無時休胡君亦是聽泉者胸次磊落非常傳
何當暇日登君樓與君作記樓上頭

題趙松雪重江疊嶂圖

明 陳敬宗

曠望不可極江山圖畫中晴空開浩蕩元氣闢鴻濛遠
樹崑崙外扶桑滄海東黃河來萬里弱水出三峰帆影
秋波棹潮音曉寺鐘雨收龍入壑煙暝鶴歸松妙墨真
名筆神機奪化工古來精絕者誰似水晶宮

趙松雪長江疊嶂圖

明 吳寬

長江滔滔向東瀉憶昔扁舟順流下慈悲閣前浪花白
兩岸青山似奔馬蕪葭楊柳風颭颭江行六月疑深秋
歸來已是十年事看畫偶然思舊遊江流樹色非邪是
仍見山腰隱高寺赤岸滄洲杳靄間咫尺悠然起愁思
苔溪影落鷗波亭王孫弄筆何時停北來戎馬暗江滸
千古遺恨歸東溟

題谿山疊翠卷

明唐寅

春林通一徑野色此中分鶴跡松根見泉聲竹裏聞草

青經宿雨山紫帶斜曛采藥知何處柴門掩白雲

趙松雪重江疊嶂圖

明陳鑑

松雪仙人秉巨扛一時揮灑世無雙後山雲起嶂西嶂
隔浦帆過江外江潮退淺沙寒鴈集聲來遠市晚鐘撞
畫圖咫尺殊千里諸老風流久已降

為王元美題王晉卿煙江疊嶂圖

和蘇長公韻

明張鳳翼

生綃六尺千重山山頭隱約生雲煙仙遊展此忽驚悟

恍復行役心茫然初疑蓬窓夢五老髣髴倒挂匡廬泉
又疑黃河放舟楫順流百折沿長川浮圖嵯峨綵雲表
人家高下蒼崖前得無蓬山與海嶠凌波別有壺中天
王郎丘壑出毫末丹青金碧相爭妍分明秦源入晉世
變幻滄海成桑田長公愛此作長句紙尾題之元祐年
中丞懷賢喜步武玉環飛燕俱嬋娟枕中抽書納此卷
陶然枕石江干眠東山自足老謝傳北闕何勞呼謫仙
鳳廷賡歌麟閣畫暫寄物外成清緣煙巒可攀亦可望

宋君惆悵明河篇

題王晉卿煙江疊嶂圖蘇子瞻歌

仍用
蘇韻

明
王世貞

千濤躍江千疊山晴煙籠山山吐煙與君柱笏聊騁望
但見一氣長蒼然細看雲腰出矮屋復有木末奔寒泉
漁網迎陽罾小港布帆吹籟彌平川王家禁臠得此景
骨格迥出荆關前胸中八九小雲夢筆底萬頃滄浪天
睂山學士高興發秀句欲奪春江妍以茲不愛玉堂美

去買陽羨山中田此圖此歌有神護小住人間四百年
摩挲絹素開黯淡飛舞醉墨藏便娟卧游齋頭一展看
恍若身對湘巫眠鼎湖髯挂都尉去學士亦非芙蓉城
內仙鄒陽後身薄自曉舍我誰結三生緣嗚呼江煙幻
滅在俄頃萬古不廢王蘇篇

趙松雪重山疊嶂圖歌

明
王世貞

昔登江上山頗愛江上句天際識歸舟雲中辨煙樹長
風不起漁歌閒大鵠小鳧爭往還坐身突兀峭嶺表著

眼莽蒼熹微間歸來舉頭觸四壁但覺膏肓有泉石誰
洗丹青開墨素令我蒼翠流裊席摩挲舊遊亦如此髣
髴煙霞指端起山凹那當別有雲天低不辨誰為水吳
興王孫妙自知不諱前身為畫師直將平遠苔雪趣寫
出滉瀲金焦奇老夫手挈盧敖杖更辨鴟夷五湖舫欲
作寰中汗漫游即披此卷神先往

雲林生畫林亭遠岫

明
顧敬

雲林八法寫倪迂夏木幽亭翠幾株雨後長洲政如此

騎駝山色近何如

寄題台州倅廳雲壑

宋樓鑰

頃年登臨赤城裏江繞城中萬家市
治中寄我雲壑圖快讀新詩眼如洗
回思歲月如星流念念飛空尋舊遊
披圖哦詩想幽致直欲攜節上山頭
聞有於菟在岑蔚晚徑寒鷗敢翔集
幾年榛棘蔽鸛鷖一朝絕境從中出
細路雖非五達康縈迴自覺阻且長
萬壑風煙開絕頂一丘曲折于中藏
老沙射日眼星炯梅峽含風襟袖冷

千巖高下各異狀如障如峰亦如嶺天意須憑意匠營
山不在高仙則名規模已定力未暇他時會有滕王亭
風浪隔闊天垂幕安得扣問親剝啄哦詩夢到故山川
睡美不知鐘鼓傳

題高彥敬煙嵐圖

元程鉅夫

西南多連峰東北多大野大野少人耕連峰有人寫寫
之貽卧遊誰為識真者獨有房山公癖山如癖馬向宦
浙河干收拾不盈把雲煙何慘澹水木亦瀟灑匪獨妙

丹青秀句蔚騷雅胸中殊磊砢筆底聊復且君看諸可
翫何者獨非假削平藝稻梁庶以飽天下

李咸熙翠巖流壑圖

元黃公望

石磴連雲暮靄霏翠微深杳玉泉飛溪迴寂靜塵蹤少
惟許山人共採薇

雲峰圖

元袁桷

融融洩洩互低昂絕頂瓊冠白玉裳聞道溪南三尺雨
道人推枕台髯羊

題雲嵯圖

元 傅若金

高崖含青空雲氣所出入綰縕日千態嶄絕恒特立雨
合龍挂低風迴鳥飛急寄言為山者進簣庶可及

郭天錫雲岫圖

元 吳師道

撩亂春雲雜曉嵐時于湧雪出青藍依稀一筆誰傳與
北固山前海岳菴

題白府判仲謙所藏錢舜舉巖壑圖

元 劉 詵

我如謝公好名山開卷著我千巖萬壑間亂煙遙峰出
縹緲怪石翠樹相回環忽然山破飛瀑落皎如仙人玉
帶垂雲端喧飀欲撼溪谷動使我毛髮森清寒不知其
間有何徑但見荷擔兩兩相追攀浮屠崔嵬蒼壁頂佛
屋隱映長松關下通窈窕知何處想見小溪穿石去沙
邊汲叟犬相隨橋上行人驢半渡林空路斷孤舟橫或
坐舟尾或疾撐左巖右灘地苦狹長篙落石如有聲我
疑桃源從此逝恍若風景非人世欲呼錢郎問其塗錢

郎已去誰能呼

為鄧靜春作幽谷圖

元 朱德潤

深深冥冥溪谷陰怪石突出當重林迴壑奔流石礚礚
寒霧噴薄浮輕岑猿猱飛攀山欲立懸崖老樹蒼鱗濕
有客擔簦負長笈欲行不行驢脚澀風吹征衣天欲暮
旅館不逢前阻渡此際遙知行路難却向今朝畫中覩

為唐景玉畫丘壑圖

元 倪瓚

丹青留玉斧真錄佩青童蛻迹氛埃外怡情巖穴中吹

笙絳嶺月理詠舞雩風欲畫玄洲趣揮毫清興同

趙元畫懸崖圖

明楊基

懸崖無根谷無底樓閣參差半空起不信神工斧鑿成
人間至險無如此我對畫圖猶拊膺何況崎嶇險處登
槿樹籬邊堤似掌藕花池上月如燈

題江岫圖

明張紳

烏衣巷裏東風老蝴蝶飛來滿芳草美人春夢隔天涯
十二巫山看不歸巫山巫峽江水新煙波渺渺江南春

鴛鴦不識橫塘路
鸚鵡鵲牕間呼向人
青綾誰共官曹宿
雪楮雲毫吮晴綠
太常春甕碧霞沉
六曲屏風對銀燭

題雲門翠微深處

明僧大圭

溪閣重重翠崦遮
無時雲氣濕袈裟
千峰樹色藏朝雨
六寺鐘聲送晚鴉
筆塚天寒收柿葉
香壇風落埽松花
倦遊每憶消閒地
早晚扁舟向若邪

題趙谿所收趙令穰大年煙林

二首

宋張耒

江上孤煙蔽遠林
秋原人靜下鳴禽
水鄉此景常經眼
誰信侯家畫萬金

楓林荻港白晝靜
落鴈飛鷗盡日閒
平遠起君千里恨
清詩可要助江山

題黃華江皋煙樹

二首

金雷淵

疎柳靜茆亭亭下
長江路不見亭中人
蕭蕭煙景暮
江山萬里眼一亭畧約之
黃華未死在看取畫中詩

題煙波雲樹圖

為楊元清賦

元丁復

江鄉自是多煙雲綠波青樹渺不分小檐大棟隔兩濱
黑隄如蟻人如蟲布帆西來飽風色寒聲動地秋紛紛
黃蘆白蕖搖斷渚坐客回頭聽急雨孤篷遙遙半鍼許
健刺沙灣逆風去亦知家在前邨住百年即合老為農
六十江湖禿鬢翁而今借宅六帝宮眼花霧落天濛濛
夢魂不到潯陽浦為人愁水更愁風

寄謝方方壺寫寄遙山古木

元成廷圭

鬼谷陰陰苔蘚斑只除猿鶴伴高閒丹光或在藤蘿外

劍氣常留水竹間
每讀內篇消永日
還將生紙寫遙山
衰翁可是無仙骨
不得相從共往還

高彥敬遠山木石圖

二首為紀夢符學士作

元 袁 桷

身比寒厓枯木心似浮雲太虛
落日前峰堪隱丹青渺渺愁予

黃髮蒼顏並轡白雲青山比肩
誰道風流已矣只今圖畫依然

題青山碧篠圖

元吳鎮

青山白雲繞碧篠蒼煙迷幽人日無事坐聽山鳥啼鳥啼有真趣對景看山隨所遇乾坤浩蕩一浮漚行樂百年身是寄

題溪山煙樹圖

明謝廷柱

遠山冥濛入煙霧近山參差頭角露園榆岸柳色不分籬落邨墟欲迷路鵲鳩布穀處處鳴野渡溪橋春水生屋外青帘濕不舞萬家蠶事千邨耕右丞之畫多妙思

畫中有詩無乃是忽然煙潤生高堂瑟瑟衣裾避空翠
鳳凰臺下春可憐閩客對景心茫然披圖不覺動野興
清宵有夢巴江田

雲山煙樹圖

明唐寅

煙山雲樹靄蒼茫漁唱菱歌互短長燈火一邨雞犬靜
越來溪北近橫塘

題遠峰卷

明陸深

草堂虛敞對羣山日日鈎簾意獨閒度海亂雲封畫戟

洗天涼雨濕青鬟
秋高古樹微茫裏
日暮層巒縹緲間
自是謝公多逸興
每攜僧屐恣躋攀



御定歷代題畫詩類卷十

欽定四庫全書

集部

御定歷代題畫詩類卷十一
二

詳校官侍郎_臣李封

主事銜_臣徐以坤覆勘

總校官降調編修_臣倉聖脉

校對官編修_臣吳錫麒

謄錄監生_臣黃恒謙

欽定四庫全書

御定歷代題畫詩類卷十一目錄

山水類

戲題王宰畫山水圖歌

唐杜甫

陳式水墨山水

唐方干

盧卓山人畫水

唐方干

題稚川山水

唐戴叔倫

題羅稚川畫卷

元陳旅

題羅稚川小景

元劉詵

題彭宜遠所藏羅稚川山水樓閣圖

元劉詵

題稚川山水

元丁復

摩詰畫

宋黃庭堅

觀王生所藏王維畫

明袁凱

王右丞山水真蹟歌

明祝允明

次韻子由書王晉卿畫山水

宋蘇軾二首

題王晉卿畫後

宋蘇軾

題王詵都尉畫山水橫卷 宋蘇轍三首

王都尉山水 元元好問

王晉卿畫 元吳鎮

題王晉卿畫 元華幼武

學士院燕侍郎畫圖 宋王安石

燕侍郎山水 宋王安石

題燕肅畫卷 元仇遠

燕文貴山水 元袁桷

觀燕肅畫

元唐肅四首

題燕肅山水卷

明冷謙

題華光畫山水

宋黃庭堅二首

題華光長老畫

宋韓駒二首

書郭熙橫卷

宋蘇轍

郭熙山水卷

元劉因

郭熙山水畫卷

元張庸

郭熙山水小景

明張適

題米元暉畫

宋朱子

米元暉山水

元牟獻

有人示山水畫卷以為元暉作求詩

元戴表元

題米元暉山水

元趙孟頫

題米元暉山水

元吳澄

題金德原所藏元暉小景

元黃潛

米元暉畫卷

元吳鎮

題米南宮畫

元郊叟

題米元暉江山小景

元趙訪

元暉山

元郭昇

題米元暉墨山

元于立

題米元暉畫山水

元陸友

題元暉山水

元張天英

畫山水歌題米元暉卷

元張天英

題宋子章效米元暉山水圖

明劉基

題米元暉山水

明張以寧

題米老山水

明王傳

題米南宮水墨圖

明吳寬

題畫米家山水

明李日華三首

小米山水

明祝允明

倣米元章筆意因題

明董其昌二首

米友仁畫卷

元吳鎮

范寬山水

元張翥

題魯彥康所藏范寬山水手卷

元錢惟善

范寬畫卷山水

元牟魯

范寬畫卷山水

元劉元佐

范寬畫卷山水

元王蒙

范寬畫卷山水

元葉廣居

奉題朱澤民先生畫山水圖

元李祁

題朱澤民畫山水

元黃鎮成

朱澤民山水

元鄭元祐二首

題朱澤民山水

元陳基

題朱澤民山水

元鄭韶

朱澤民畫

明蘇伯衡

朱澤民山水歌

明虞堪

觀朱澤民所畫山水有感

明袁凱

朱澤民山水

明沈周

題湯溪胡氏藏朱澤民山水大幅

明吳寬

御定歷代題畫詩類卷十一目錄

欽定四庫全書

御定歷代題畫詩類卷十一

山水類

戲題王宰畫山水圖歌

唐杜甫

十日畫一水五日畫一石能事不受相促迫王宰始肯
留真跡壯哉崑崙方壺圖掛君高堂之素壁巴陵洞庭
日本東赤岸水與銀河通中有雲氣隨飛龍舟人漁子
入浦叙山水盡亞洪濤風尤工遠勢古莫比咫尺應須

論萬里馬得并州快剪刀翦取吳松半江水

陳式水墨山水

唐方干

造化有功力平分歸筆端溪如水後聽山似燒來看立

意雪髯

一作霜髯

出支頤煙汗

一作汁

乾世間從爾後應覺致

名難

盧卓山人畫水

唐方干

常聞畫石不畫水畫水至難君得名海色未將藍汁染
筆鋒猶傍土堆行散吞高下應無岸斜蹙東南勢欲傾

坐久神迷不能決却疑身在小蓬瀛

題稚川山水

唐戴叔倫

松下茅亭五月涼汀沙雲樹晚蒼蒼行人無限秋風思
隔水青山似故鄉

題羅稚川畫卷

元陳旅

雨氣通林壑江光動野航道人巖下去茅屋樹邊涼
斷岸入秋水遠山留夕陽登臨莫作賦游子未還鄉

題羅稚川小景

元劉詵

遠洲連岡近洲平高樹稀葉低樹青長溪浸日流無聲
中有數葉漁舟橫誰家飛軒接水亭沙邊客至扶杖迎
江邨頗類浣花里人品無似陶淵明

題彭宜遠所藏羅稚川山水樓閣圖

元劉詵

平沙蒼蒼鳥未歸煙邨四合高復低漁翁兩兩青蓑衣
賣魚直上長楊堤千峰萬峰何崔嵬朽枝瞰水忽倒垂
倦驢向橋欲渡疑後有羸僕勢若追却疑詩人獨尋詩

舍鞍先濟何所之飛樓縹緲山之西中有美人長鬚眉
凭闌相對知為誰豈非海上喬與期宮中琪樹秋離離
髣髴疑有香風吹吾聞蓬萊有此地流水落花隔人世
便當贖買青芒屨小向是間住千歲

題稚川山水

元
丁復

江光如空山在天好風佳日散晴煙綠陰成蓋厓樹連
野橋楊柳亦娟娟擔簦之子何促速況有荷杖當我前
茅堂獨坐豈待客或者傲兀忘流年又疑浣花溪上叟

索句未得掩兩肘對樹不語胡為然將非得詩不得酒
好客不來兩何有耐可有酒有客無詩篇出門諒不可
天地烏用我乃不使之老為農耕種南山田陶公秫熟
五十畝往往為酒愁無錢不如兩漁翁靜釣春江船有
時掣得十尺魚紫鱗耀日錦色鮮賣魚買酒自可醉仰
歌明月披蓑眠金陵美酒斗十千老客抱甕雙檣邊長
日渴吻流無涎六代江山眼中好六帝池臺沒荒草五
錦驄嘶滿道歸來輒向蓬萊島蓬萊島海上仙凝波倒

影髮正玄百年未信人能老大笑長呼羅稚川

摩詰畫

宋黃庭堅

丹青王右轄詩句妙九州物外常獨往人間何所求袖
手南山雨輞川桑柘秋胸中有佳處涇渭看同流

觀王生所藏王維畫

明袁凱

右丞小景樹參差我有林塘實似之日日欲歸還蹭蹬
時時借看解愁思恨無黃鵠高飛去獨奈沙鷗靜不移
明日江頭候春水典衣沽酒待篙師

王右丞山水真蹟歌

明
祝允明

生煙漠漠中有樹樹外田家幾家住重巒複塢隨不斷
茅舍時時若菌附兩人並向魚梁涉一鳥遙從翠微度
行雲澹映荒水陂似有斜陽帶微煦傍篠白沙明青林
滃沉霧乍明乍晦景萬變想當夏盡秋初處石牆短綠
隈隈水淺縈迴寬平一畝敞層屋板扉犬卧無人開書
堂樹深晝寂寂主人應是王摩詰清晨騎鹿看田出行
過柴泝日向夕會招高適與裴迪共賦輞川佳事畢圖

成興盡詩未筆

次韻子由書王晉卿畫山水

二首

宋
蘇軾

老去君空見畫夢中我亦曾遊桃花縱落誰見水到人
間伏流

山人昔與雲俱出俗駕今隨水不回賴我胸中有佳處
一尊時對畫圖開

題王晉卿畫後

宋
蘇軾

醜石半蹲山下虎長松倒卧水中龍試君眼力看多少
數到雲峰第幾重

題王詵都尉畫山水橫卷

三首

宋

蘇轍

摩詰本詞客亦自名畫師平生出入輞川上鳥飛魚泳
嫵人知山光盎盎著眉睫水聲活活流肝脾行吟坐詠
皆自見飄然不作世俗詞高情不盡落縑素連峰絕澗
開重帷百年流落存一二錦囊玉軸酬不訾誰令食肉
貴公子不學父祖驅熊羆細氈淨几讀文史落筆璀璨

傳新詩青山長江豈君事一揮水墨光淋漓手中五尺
小橫卷天末萬里分毫釐謫君南出止均穎此心通達
無不之歸來纏裹任紈綺天馬性在終難羈人言摩詰
是前世欲比顧老疑不癡桓公崔公不可與但可與我
寬衰遲

憐君將帥雖有種多君智慧初無師篇章俊發已可駭
丹青妙絕當誰知自言五色苦亂目况乃旨酒長傷脾
手狂但可時弄筆口病未免多微詞歌鍾一散任池館

幅巾靜坐空書帷偶從禪老得其趣此身不足非財訾
世間翻覆岼為谷猛獸相食虎與羆逝將得意比春夢
獨取妙語傳新詩眼看官釀瀉酥酪未與邨酒分醇醪
解鞍駿馬空伏櫪寄書黃狗閒生釐江山平日偶有得
不自圖寫渾忘之臨窗展卷聊自適盤礴豈復冠裳羈
欲乘漁艇發吾興願入野寺嗟兒癡行纏布襪雖已具
山中父老應嫌遲

我昔得罪遷南夷性命頃刻存篙師風吹波蕩到官舍

號呼誰復相聞知小園畜蟻防橘蠹空庭養蜂收蜜脾
讀書一生空自笑賣鹽竟日那復詞城中清溪可濯漱
城上連峰堪幕帷十千薄俸聊足用魚多米賤憂無訾
東坡居士最岑寂岷然深藜見狐羆坐隅止鵬偶成賦
槃中食慕時作詩憐君富貴可炙手一時出走羞啜醢
澤傍憔悴凡幾歲胸中芥蒂無一釐江山別來今久矣
不獨能言能畫之同朝執手不容久笑我野馬方受羈
袖中短卷墨猶濕傍人笑指吾儕癡方求農圃救貧病

他年未用譏樊遲

王都尉山水

元 元好問

平林漠漠數峰閒
詩在巖姿隱顯間
自是秦樓畫看手
不能辛苦作荆關

王晉卿畫

元 吳 鎮

晉卿繪事誠無匹
尺素能參造化功
碧樹依微春水闊
蒼山縹緲暮雲籠
幽深自覺塵氛遠
閒澹從教色相空
更喜涪翁遺墨好
草堂何必獨稱工

題王晉卿畫

元華幼武

公子何年寫翠微江南耆老憶題詩
風流文彩俱零落水綠山青似昔時

學士院燕侍郎畫圖

宋王安石

六幅生綃四五峯暮雲樓閣有無中
去年今日長千里遙望鍾山與此同

燕侍郎山水

宋王安石

往時濯足瀟湘浦獨上九疑尋二女
蒼梧之野煙漠漠

斷壠連岡散平楚暮年傷心波浪阻不意畫中能更覩
燕公侍書燕王府王求一筆終不與奏論讞死誤當赦
全活至今何可數仁人義士埋黃土祇有翰墨歸囊楮

題燕肅畫卷

元仇遠

溪路迢迢繞碧峰白雲迷却舊行蹤買舟歸去山中住
終日茆亭坐聽松

燕文貴山水

元袁桷

晚色蒼茫外秋聲縹緲間亂溪環水佩千嶂疊雲鬟曉

瀑村春急風林寺鐸閒片帆如可託吾欲與君還

觀燕肅畫

雜題
四首

元唐肅

瑤臺倚中天翠壁拂遙斗疑是仙山居玲瓏見牕牖
雲殿覆巖厓風幡出林薄似聞齋磬音山禪定初覺
活活溪泉語蕭蕭谷吹繁遙憐負橐子曰暝未投邨
煙岑隔浦微漁屋依梁小應恐到家遲歸舟疾如鳥

題燕肅山水卷

明冷謙

依稀廬岳高僧舍髣髴商山隱者家我亦抱琴來谷口

白雲深處拾松花

題華光畫山水

宋黃庭堅

華光寺下對雲沙
欲把輕舟小釣車
更看道人煙雨筆
亂峰深處是吾家

題華光畫

宋黃庭堅

湖北山無地
湖南水徹天
雲沙真富貴
翰墨小神仙

題華光長老畫

二首

宋韓駒

曉出華光寺
雲沙照眼新
歸來看圖畫
借問若為真

昨欲浮湘去，寒裳望九疑。
清湘今入手，一棹更何之。

書郭熙橫卷

宋蘇轍

鳳閣鸞臺十二屏，屏上郭熙題姓名。
崩崖斷壑人不到，枯松野葛相欹傾。
黃繖給舍多肉食，食罷起愛飛泉清。
皆言古人不復見，不知北門待詔白髮垂。
冠纓袖中短軸纔半幅，慘淡百里山川橫。
巖頭古寺擁雲水，沙尾漁舟浮晚晴。
遙山可見不知處，落霞斷鴈俱微明。
十年江海興不淺，滿帆風雨通宵行。
投篙掾杙便止宿，買魚沽

酒相逢迎歸來朝中亦何有包裹觀闕圍重城日高困
睡心有適夢中時作東南征眼前欲擬寫真物拂拭東
絹付與汾陽生

郭熙山水卷

元劉因

巖姿秋意淡無弦煙影天機滅沒邊更看山翁掩書坐
只應人境兩翛然

題郭熙山水畫卷

元張庸

青山歷歷樹重重寺在雲深第幾峰比屋人家西崦下

夕陽長聽講時鐘

郭熙山水小景

明張適

何人林穴寄幽棲茅屋參差綠樹低誰遣小山招隱去
巖花落盡暝猿啼

題米元暉畫

宋朱子

楚山真叢叢木落秋雲起向曉一登臺滄江日千里

米元暉山水

元牟獻

鵲突煙樹外水遠山更長天地有如許扁舟何處藏如

何短篷底結習猶未忘是時水月繁不見此夜光於今
尚無恙懷袖行可將我亦流落者此味慣所嘗誰能畫
峨眉坐我於其傍

有人示山水畫卷以為元暉作求詩

元
戴表元

硯山山下小於菟文彩爛斑今亦無一塢亂雲濃似漆
春風吹夢過西湖

題米元暉山水

元
趙孟頫

澄江漾旭日青嶂擁晴雲孤舟彼誰子應得離人羣

題米元暉山水

元吳澄

一水兩山間水如練帶山如褰昔見江山如圖畫今觀
圖畫如江山米家下筆亦等閒盧家珍襲同瑤環一朝
身後落人手又為好者開歡顏我家一幅廣長畫朝夕
對之如列班有力莫能偷奪去常青常白色不黧若將
此幅與論價酬金何啻千百鏹

題金德原所藏元暉小景

元黃潛

牀頭書畫正縱橫忽值今朝醉眼醒起向米家船上看
雲山元是舊時青

米元暉畫卷

元 吳 鎮

煙光與山色縹緲想為容不知山色淡為復煙光濃虎
兒斷入圖畫中憑闌展卷將無同但令絕景長在眼從
渠絕靄隨春風

題米南宮畫

元 郊 韶

風流不見米南宮依舊雲林遠樹重貌得匡廬舊遊處

半江秋色洗芙蓉

題朱元暉江山小景

元趙訪

滄波浩無津揮手揚帆去迴顧江上山蒼蒼但煙樹結
茅傍洲渚豈少垂綸處終然塵迹近未及扁舟趣世運
如風颭朝新夕成故白雲何亭亭倏爾天際住寄謝山
中人奚為獨多慮

元暉山

元郭界

灌木蔭滄洲閒雲疊層巘茅茨在咫尺徑路渾莫辨王

家玉印章翰墨屹冠冕悵望海嶽菴禾黍西風轉

題米元暉墨山

元于立

生來墮塵網苦為塵網縛暇日起我早騎驢出東郭城
門老人髮半垂問我騎驢何所之為言欲向山中去茅
屋正在清溪湄山中之人面如玉手把素書跨黃犢石
泉夜煮茯苓香滿屋秋雲邀共宿綠蘿晚月懸松風縹
緲惟聞煙外鐘十年往事一回首已隔雲山千萬里潦
倒狂吟頭半白把卷令之念疇昔石田瑤草近如何題

詩好寄山中客

題朱元暉畫山水

元陸友

翳翳雲中樹亭亭江上山秋風生柁尾蕩漾碧波間

題元暉山水

元張天英

江上江雲漠漠寒有時帶雨過層巒只愁海嶽菴前路
水沒黃沙鴨嘴灘

畫山水歌題朱元暉卷

元張天英

我有山水癖由來好幽棲十年遊鴈蕩五年遊會稽或

言秦王昔時愛仙術驅石下海如鳬鷖洞口誰能斲龍
耳驪珠夜照天雞啼三峰參差九華老蛟龍鼓浪方壺
低醉墨淋漓落吾手咫尺萬里雲淒淒初疑巨靈闢開
翠巖濕馮夷擊碎青玻璃人疑劉阮雙行赤城下漁舟
棹入桃源溪對此長歌發幽思便欲著屐來攀躋我家
碧山最奇絕綠蘿萬丈緣丹梯憶昨金門拂衣去自種
青松與人齊幾人欲畫畫不到惟有四時雲月可以相
招攜吾負碧山此為客何異乎巢由軒冕行塵泥從吾

好歸來兮

題宋子章效米元暉山水圖

明
劉基

昔時米南宮父子同畫癖油然煙雨態千里入盈尺近
代宋尚書筆意妙欲逼置之几格間新舊莫辨識應是前
後身神會造化迹鴻濛迷日月瀕洞飛霹靂蒼崖晦中
斷天闕杳高隔洪濤漲無倪龍虎移窟宅農夫怨昏墊
樵牧絕行跡破屋兩三家搖撼已傾側得非杜少陵無
乃陶彭澤簷茅委泥濘籬菊沒狼籍空汀乏舟楫汗漫

安所適披圖瞻青冥惆悵至終夕

題米元暉山水

明張以寧

高堂曉起山水入古色慘澹神靈集望中冥冥雲氣深
祇恐春衣坐來濕江風吹雨百花飛早晚持竿吾得歸
身在江南圖畫裏令人却憶米元暉

題米老山水

明王偁

海嶽菴前覓舊蹤蒼茫雲樹米南宮別來幾片秋山影
都付寒鷗一遂風

題米南宮水墨圖

明 吳寬

雲山煙樹總模糊，此是南宮鵲突圖。
自笑頂門無慧眼，臨窗墨蹟淡如無。

題畫米山

明 李日華

吳山盡處越山涯，水木清華處處佳。
山鳥忽來啼不歇，聲聲似勸我移家。

米家山水二首

明 李日華

石赭斑斑半雜苔，晴雲纔去雨雲來。
米家山色渾無定。

潑墨何人解脫胎

平磯小坐一開顏
樹影蕭疎石蘚斑
莫訝濕雲飛不起
米家原自有晴山

小米山水

明
祝允明

襄陽松濬未曾乾
十里瀟湘五尺寬
樵徑不禁苔露滑
漁蓑長帶水雲寒
澄澄僧眼連天碧
澹澹蛾眉隔霧看
恐為醉翁當日寫
平山堂上雨中觀

做米元章筆意因題

二首

明
董其昌

烏絲白練是生涯
但向滄江問米家
從說遠山多姍媚
可知矮樹是枇杷

春入寒枝未著花
濕雲細雨罨平沙
天公似合襄陽戲
我畫煙山不較差

米友仁畫卷

元吳鎮

元章筆端有奇趣
時灑煙雲落縑素
峰巒百疊倚晴空
人家掩映知何處
歸帆直入青冥濛
曲港荷香有路通
更愛涪翁清絕句
相攜飛上蓬萊宮

范寬山水

元張翥

憶昔往尋剡中山四明天姥相縈盤客路上頭穿鳥道
行人脚底蹋風湍旦寒露重多成雨洩霧濛雲互吞吐
僕夫相呼巖壑間空響磨人作人語溪窮岸斷地忽平
石門壁立如削成隔水無數山花明中有人家雞犬聲
向來老眼曾到處此景俱作桃源行百年留在范寬筆
水墨精神且蕭瑟上有翰林學士之院章恐是宣和舊
時物林猿野鶴應自在令我相見猶前日時平曾乞閒

身歸一壑得專吾事畢

題魯彥康所藏范寬山水手卷

元錢惟善

看雲終日坐蒼苔溪上千峰紫翠堆
種竹人家臨水住抱琴客子過橋來
欲書盤谷先生序更把潯陽處士杯
他日卜居能似畫草堂題作小蓬萊

范寬畫卷山水

元年魯

丘壑胸中起龍蛇筆底生斯人皆沒世
羨爾獨鍾情未識真為幻徒聞畫有聲
誰能寫廬阜翠色到牕楹

范寬畫卷山水

元 劉元佐

范寬筆法天下稀峰巒峭拔尤崛奇龍翔鳳舞入霄漢
白畫慘淡陰雲垂玉堂仙人揮翰手綵筆留題世希有
祇今流落百餘年滿紙龍蛇欲飛走

范寬畫卷山水

元 王蒙

范寬墨法似營丘散落人間二百秋咫尺畫圖千里思
山青水碧不勝愁

范寬畫卷山水

元 葉廣居

范翁作畫絕代無巖壑交錯青珊瑚玉堂仙人妙題品
千載見題如見圖亂後圖書絕狼籍奇珍委地無人識
蕭條錦繡世間希拂拭墨痕三歎息

奉題朱澤民先生畫山水圖

元李祁

洞庭之南湘水東青山奕奕蟠蒼龍雲陽峰高七十二
欲與衡嶽爭為雄我家近在雲陽下來往看山如看畫
十年塵土走西風每憶雲陽動悲咤吳中勝士朱隱君
筆精墨妙天下聞畫圖畫出湘江水青山上有雲陽雲

雲陽山高湘水綠十年不見勞心目只今看畫如看山
萬里歸情寄鴻鵠

題朱澤民畫山水

元黃鎮成

與客浮湘水琴書共一舟雲間雙樹晚天外數峰秋指
顧消塵慮棲遲發樵謳未知身是畫明月滿滄洲

朱澤民山水

元鄭元祐

樓觀參差山礪坳漁舟遠嘯出林梢白雲度盡千峰碧
驚石幽人始定交

朱澤民山水

元鄭元祐

吹蕭江浦秋舟蕩，碧雲幽擬遡巖松。
下詩盟訂白鷗。

題朱澤民山水

元陳基

東曹興遂秋風起，長揖齊王歸故里。
託言鱸膾與蓴羹，遠害全身良有以。
神交海上陶朱公，遭世雖殊心則同。
讀書把釣松江尾，仰看浮雲行太空。
八月嚴霜下喬木，萬里青冥眇飛鵠。
為謝長安馬上郎，世間何物為榮辱。

題朱澤民山水

元郊 韶

洞庭南下水如天
蓬底看書白日眠
我亦憐君愛山色
直須買酒過秋船

朱澤民畫

明
蘇伯衡

朝朝謀隱地忽見好山川
雄麗皆衡霍幽深別澗瀝
羊眠松石下虹掛屋頭泉
便欲抽簪去依崖結數椽

朱澤民山水歌

明
虞堪

江山青青江水綠
市上何人吹紫竹
避暑宮前不見春
落花滿地遊麋鹿
千古江山列畫圖
朱侯解寫咫尺煙

糝糊扁舟依然在洲渚應可自此歸五湖昔人去者今有無昔人去者今有無

觀朱澤民所畫山水有感

明袁凱

朱公畫圖愛者衆聲價端如古人重王卿鉅公數見尋往往閉門稱腕痛我時挾冊遊郡城朱公愛我詩律精時時沽酒留我宿共聽西牕風雨聲清晨起來忘洗盥短衣飄蕭臨几案太行中條眼底生巖岫冥冥氣凌亂禹鑿龍門疏泮水根入黃河源不斷南及衡陽抵桂林

東入會稽連海岸是中寘我一畝宮正如浮萍在江漢
溪流浣浣石齒齒夾岸桃花途遠邇原頭煙霧散雞犬
屋裏詩書雜童穉扁舟遠來知是誰豈是昔日鷗夷皮
五湖鰕菜殊可樂千古功名何足奇只今四十有三載
公竟不歸圖畫在世間好手豈易得終日紛紛勞五彩
感時念舊心獨苦況我頭顱白如許呼兒捲却不忍看
白髮高堂淚如雨

朱澤民山水

明沈周

睢陽老人營丘徒意匠妙絕絕代無為留清氣在天地
便就片紙開江湖長松落葉風細細幽構紫蘿倚江住
壁虎書魚蕩水光老屋疎茅通雨氣老人不歸空北山
芳杜春風應厚顏微官縛人萬事拙安得浮雲相往還
宦海黃塵迷白髮雲壑風泉清入骨思家看畫方兀然
叫落西窻子規月

題湯溪胡氏藏朱澤民山水大幅

明

吳寬

晴雲亂落長澗疊嶂秀依密林水樂鏗然自作茅堂可

徹鳴琴

御定歷代題畫詩類卷十一

欽定四庫全書

御定歷代題畫詩類卷十二目錄

山水類

純甫出釋惠崇畫 宋王安石

惠崇畫 宋王安石

題巨然畫 元王冕

僧巨然畫 元鮮于樞

巨然山水 元袁桷

巨然小景

明高啓

秋日寫巨然筆意與若休

明李日華

題董北苑山水

元鮮于樞

題董源山水圖

元吳澄

董源小幅

元吳鎮

趙伯駒畫

元吳鎮

趙伯駒畫

元吳鎮

趙千里山水長幅

元鄧文原

趙千里山水長幅

元吳鎮

趙千里畫

元吳鎮

記子昂畫

元虞集

趙子昂仿顧愷之

元鄧文原

趙待制山水

元陶宗儀

子昂畫

元陳高

子昂仿顧愷之

元吳鎮

趙子昂仿陸探微筆意

元黃公望

趙文敏公山水

元王逢

子昂小景

明祝允明五首

題松雪山水

明僧古淵

題趙仲穆畫

元鄭韶

題趙仲穆山水

元仇遠二首

題仲穆山水

元貢師泰

題趙仲穆山水圖歌

元黃玠

題趙仲穆畫

明王燦

子久為危太僕畫

元吳鎮

子久為徐元度畫

元吳鎮

黃子久山水

元鄭元佑二首

追和鐵崖先生題黃子久畫

明周傳

仿子久小筆

明李日華

題仿黃子久畫

明董其昌

題黃子久山水

明僧妙聲

王叔明卷

元吳鎮

王叔明山水圖

明吳寬

長幅繭紙仿叔明

明李日華

山水仿叔明與竹雨

明李日華

題王叔明畫

明董其昌

題商德符山水圖

元馬祖常

商學士畫山水歌

元馬祖常

題商侯畫山水圖

元貢奎

題胡廷暉畫

元鄭韶

再題廷暉山水

明張羽

題高房山畫

元鮮于樞

高房山畫

元王士熙

次韻題高房山畫卷

元倪瓚

題高房山畫

明徐賁

題高房山畫山水行

明黃希英

高房山小畫

明傅汝舟

題高房山山水

明吳寬

題高房山橫軸

明文徵明

題畫山水似盛子昭

元黃玠四首

題韓介石所藏盛子昭畫

元黃玠

題盛子昭畫

明貝瓊

題盛懋畫

明郭鈺

題盛叔章畫

元鄭洪

盛叔章山水畫

元王璋

盛叔章山水畫

元楊維禎

盛叔章畫

明鮑恂

題倪雲林畫

元錢惟善

題元鎮畫

元鄭韶三首

倪雲林為靜遠畫

元黃公望

和雲林題畫

元鄭元祐

雲林小景

元鄭元祐

題雲林小景圖

元倪瓚

次韻雲林畫

元華幼武

為吳子道題雲林畫

元華幼武

雲林畫山水竹石

元華幼武

題倪雲林畫

明李東陽

倪雲林畫

明卞同

題雲林小景

明高啓

題倪雲林畫

明俞貞木

雲林畫

明王鏊

題倪元鎮小畫

明施漸

題仿雲林筆意

明李日華

題仿倪迂畫

明董其昌

題倪雲林小幅山水

明僧元璞

題曹雲西畫

元倪瓚

題曹雲西山水

元王冕

題雲西畫卷

元吳鎮

曹雲西山水

明王遠

題唐子華山水

元鄭韶

題唐子華畫山水

明僧復初

御定歷代題畫詩類卷十二目錄

欽定四庫全書

御定歷代題畫詩類卷十二

山水類

純甫出釋惠崇畫要予作詩

宋 王安石

畫史紛紛何足數
惠崇晚出吾最許
早雲六月漲林莽
移我翛然墮洲渚
黃蘆低摧雪翳土
鳬鴈靜立將儔侶
往時所歷今在眼
沙平水澹西江浦
暮氣沈舟暗魚罟
欹眠嘔軋如聞榜
頗疑道人三昧力
異域山川能斷取

方諸承水調幻藥灑落生綃變寒暑金坡巨然山數堵
粉墨空多真漫與大梁崔白亦善畫曾見桃花靜初吐
酒酣弄筆起春風便恐漂零作紅雨流鶯深枝婉欲語
蜜蜂掇蕊隨翅股一時二子皆絕藝裘馬穿羸久羈旅
華堂豈惜萬黃金苦道今人不如古

惠崇畫

宋王安石

斷取滄洲趣移來六月天道人三昧力變化只和鉛

題巨然畫

元王冕

溪山對雨起呼酒一笑還披萬里圖
踈樹遠山秋淡薄
飄風流水盡模糊

僧巨然畫

元
鮮于樞

秋鱸春鰕足杯羹萬頃煙波雨
櫂橫就使直鉤隨分曲
不將浮世釣浮名

巨然山水

元
袁桷

空江浩蕩挾秋聲不是匡廬只秣陵
老子定回神觀靜
笑渠艇子浪千層

巨然小景

明 高 啓

隔溪山閣映秋開，坐久鐘聲度水來。
遙指石橋邨樹杪，一僧歸處是中台。

秋日寫巨然筆意與若休

明 李日華

山光沉綠樹酣黃，九月江南欲試霜。
獨坐灘頭不垂釣，蓼花風急送漁榔。

題董北苑山水

元 鮮于樞

愛山不得山中住，長日空吟憶山句。
偶然見此虛堂間，

頓覺還我滄洲趣陰厓絕壑雷雨黑蒼藤古木蛟龍怒
岸石聲礧溪澗濶知有人家入無路一重一掩深復深
危橋古屋依雲林是中宜有避世者我欲徑去投冠簪
源也世本膏粱子胸中丘壑有如此後來僅見僧巨然
筆墨雖工意難似想當解衣盤礴初意匠妙與造化俱
官閒祿飽日無事吮墨含毫時自娛誰憐齷齪百僚底
雙鬢塵埃對此圖

題董源山水圖

元
吳 澄

帝里春風二月天黃塵千丈暗鞍韉蒼蒼萬木煙雲裏
何處山川到眼前

董源小幅

元 吳 鎮

煙水冥迷山遠近高山臨水更清寒茆堂深倚林中構
商舶遙從海島還雲起亂峰生巧思鳥飛殘照入遐觀
生綃僅尺無窮意誰識經營慘澹間

趙伯駒畫

元 吳 鎮

風色淒其上碧山一朝林木變紅顏幽人為惜深秋色

忘却驅馳古道間

趙千里山水長幅

元 鄧文原

蒼山高處白雲浮樓閣參差帶遠洲
千尺虬龍依絕壁一羣鸛鶴唳清秋
山翁有約憑雙屐楚客無心滌碧舟
最是霜林好風景居然咫尺見丹丘

趙千里山水長幅

元 吳 鎮

宋室有千里疑自蓬萊宮繪事發天性
深研境益工山高藏石磴洞古青蒙叢
秋風遍林壑萬樹葉欲空唯有

松與石不改歲寒窮行行何處客豈是商山翁臨江有
虛閣一望波溶溶輕舟徐蕩漾西嶺夕照紅荆闕為揖
讓二李堪與同庸物奚足數新圖不易逢當年置長府
珍祕更為崇書竟發長嘯兩腋來清風

趙千里畫

元吳鎮

猗歟千里諸王孫畫圖猶見二李存盤迴虛閣凌空起
蒼鬱長林來雨繁仙姬仙客居絕境試展殊覺晴雲翻
持向故山茆屋底咫尺却擬蓬萊根

記子昂畫

元虞集

春風動蘭葉庭戶光陸離言收竹上露石角挂練衣車
行不擇路茅茨何楚楚遊子憺忘歸徘徊歲云莫

趙子昂仿顧愷之

元鄧文原

溪邊春樹綠成羣重疊青山翠影分客子何來忘歸去
歌聲遙落水中聞

趙待制山水

元陶宗儀

山外溪平不肯流山前喬木易知秋水晶宮裏清幽地

不信無人著釣舟

子昂畫

元陳高

風動秋山日已晡
舊時林苑盡荒蕪
王孫去國猶無恙
解寫江南煙樹圖

子昂仿顧愷之

元吳鎮

隔水山高青隱日
傍溪古樹綠藏雲
閒翁自有閒遊伴
更愛溪鷗閒作羣

趙子昂仿陸探微筆意

元黃公望

千山雨過瓊琚濕萬木風生翠幄稠行遍曲闌人影亂
半江浮綠點輕鷗

趙文敏公山水

公於畫左題云至大三年六月望日為吳彥良畫并詩有岸靜樹陰

合溪晴雲氣流之句
想在鷗波亭作也

元王逢

何山弁山秀可掬上若下若蒼苔綠翰林學士偶歸來
亭倚鷗波送飛鵠鵠飛盡沒蒼茫境衣上青天倒搖影
鹿頭舫子湖州歌想帶南風覺淒冷冰盤瓜李進仲姬
生綃畫就復題詩鄭虔三絕世無有嗚呼何幸再見至

大三年時

子昂小景

五首

明
祝允明

春山雨新沐掩靄結濃綠一葉金芙蓉粲粲迎朝旭
漁舟何所至兩兩鏡光中沿洄沂春漲更喜天無風
江亭小於艇松子落滿頂盡日無人來流水抱虛影
晴陽破嵐暝水色當春和如何異人境而有樵者歌
隔塢有絕壁蘿扉對山開客子何為者能入深山來

題松雪山水

明
僧古淵

雪後潮痕上釣磯江南天水一絲微
萋萋芳草迷禾黍
何事王孫尚不歸

題趙仲穆畫

元 郊 韶

水晶宮裏佳公子挂笏看山逸興多
昨夜溪南新水漲
釣絲晴拂白鷗波

題趙仲穆山水

二首

元 仇 遠

綠林紅樹石崢嶸有客攜琴訪友生
今夜西軒風月好
殷勤為我鼓商聲

王孫遺迹在桐鄉
留得當年翰墨香
回首西風多感慨
不辭援筆賦嵇康

題仲穆山水

元貢師泰

翡翠為崖金作波
白雲重疊護層阿
背琴童子松間坐
束帶仙人馬上過
高閣半天開寶月
飛流千尺寫銀河
王孫已老丹青在
轉覺風流意氣多

題趙仲穆山水圖歌

元黃玠

遠山如湧波近山如積石
遠近千萬山崢嶸起寒碧
赤

甲白鹽江影空青天芙蓉五老峰野橋邨路獨歸客耳
邊髣髴東林鐘滄浪老人唱歌處日暮停篙倚江樹倒
挑笠子漁竿頭隔水高樓訪誰去

題趙仲穆畫

明王燧

十二瑤樓紫翠重萬年琪樹落秋風南朝無限傷心事
都在殘山剩水中

予久為危太僕畫

元吳鎮

予久丹青好新圖更擅場浮空煙水濶倚岸樹陰涼尺

尺分濃淡高深見渺茫知君珍重意愈久豈能忘

子久為徐元度畫

元吳鎮

木落空山秋氣高一聲疎磬出林皋歸帆點點知何處
滿目蒼煙尚未消

黃子久山水二首

元鄭元祐

小點大癡誰復然畫山畫水亦隨緣懸厓絕谷噴流泉
此中即是安養地九品蓮華光燭天

衆人皆點我獨癡頭蓬面皺絲鬢垂勇投南山刺白額

飢緣束嶺采青芝
仲雍山趾歸休日尚餘平生五色筆
畫山畫水畫樓臺
萬態春雲硯坳出只今年已八十餘
無復再投光範書
留得讀書眼如月萬古清光滿太虛

追和鐵崖先生題黃子久畫

明周傳

最愛山居養性靈
空山為几翠為屏
亂峰雨過雲猶合
小洞春深草更青
對月漫題招鶴詠
臨池長寫換鵝經
興來還解吹蕭管
有約離人夜半聽

仿子久小筆

明李日華

不是春山淡欲無
江空沙落眼模糊
鶉鳩強要司晴雨
不管人眠著意呼

題仿黃子久畫

明董其昌

積鐵千尋屈紫虛
雲端雞犬見邨墟
秋光何處堪消日
流澗聲中把道書

題黃子久山水

明僧妙聲

黃公東海客能畫
逼荆關意盡崎嶇
外精深溟滓間
猿啼明月峽木落
浩疊山谷口蘿煙
暝騎驢獨未還

王叔明卷

元 吳 鎮

短繖幾許容丘壑鬱鬱喬林更著山應識王郎胸次好
未教消得此身閒

王叔明山水圖

明 吳 寬

黃鶴高樓已搥碎空有江南黃鶴山山深有客持樵斧
終日置身林木間臨風高歌白石爛隔水或看秋雲還
老夫亦有幽居興對此徑欲遺柴關

長幅繭紙仿叔明

明 李日華

遠山煙重樹萋萋湖落沙寒水一溪獨坐茅亭無一事
晴鳩啼過雨鳩啼

山水仿叔明與竹雨

丙寅三月
清明日

明李日華

栗留呼醒仙遊夢洞壑虛無嵐翠空意裏尚存三疊水
眼前猶見百盤松有田有屋雲堆處半郭半邨山影中
筆墨自娛聊爾爾不貪人喚作盧鴻

題王叔明畫

明董其昌

南山與秋色氣勢兩爭峙閒者解其紛君今已閒未

題商德符山水圖

元馬祖常

曹南山君畫山水幅絹咫尺千萬里古木樛枝障霧雨
蒼山斷裂蹲虎兕路幽應有仙人室樓閣恍惚雲氣入
翰墨黯黯絕丹碧芙蓉峰高觀海日

商學士畫山水歌

元馬祖常

商侯畫山并畫水當今天下無雙比昔者累蒙天子知
畫日三接賜筐篚墨滓翻流雪壁滑閩嶠蜀門生寸晷
五年送絹或不得岸幘飲酒辱畫史江波沉沉樹含霧

疊嶂千層問歸路玄雲夜合風雨交漁師不畏蛟龍怒
倚雲茨屋如穹龜樛枝應有猿猱悲暝靄依稀蜃樓出
暗霏髣髴鼇峰移君不見剡藤一丈光陸離嗚嗚野人
秋行迷

題商侯畫山水圖

元貢奎

秦鞏諸山天下美相君愛山心獨喜商侯落筆圖畫裏
盤桓咫尺藏千里遠山天際抹修翳近山淡黛連雲起
下有百尺清溪水石關木盾懸崖底時見行人去如螳

危橋吹斷橫沙尾邨落林園接遐邇雲中世家重釋流
東剡凌虛構華侈撾鐘擊鼓兩巖間西剡輝煌賀蘭氏
商周遺俗亦在耳豈無當時隱君子我欲追遊繭雙趾
却愛孤舟岸旁艤商侯商侯巧能擬安得從之慰我思
呼酒盡埽溪藤紙

題胡廷暉畫

元 郊 韶

仙館空青裏春船卷畫中鷗波千丈雪漁笛一絲風

再題廷暉山水

明 張 羽

近代丹青誰第一精絕獨數吳興胡魏公家傳摘瓜圖
將軍妙筆絕代無年深粉墨紛模糊公命胡也全其污
鷗波亭前山滿湖賓客不來入跡疎以手畫肚私傳摹
歸來三日神始蘇下筆直與前人俱今人不見古人畫
古畫自與今人殊嗚呼眼前不復見此物吾與購之千
明珠

題高房山畫

元鮮于樞

素有煙霞疾開圖見亂山何當謝塵迹縛屋住雲間

高房山畫

元王士熙

吳山重疊粉團高，有客晨興灑墨毫。
百兩真珠難買得，越峰壓倒湧金濤。

次韻題高房山畫卷

元倪瓚

屋邊昨夜春風起，蔣芽荇葉生春水。
睡醒獨坐無人聲，歷歷青山水光裏。

題高房山畫

明徐賁

風流一代房山老，胸中丘壑蘊天巧。
有時意匠稍經營，

萬疊雲山筆端埽嗚呼斯人往矣不可攀畫圖千載遺人間

題高房山畫山水行

明黃希英

房山西湖之子孫一腔汎埽與雲屯有時槎枒撐肺腑
幻出雲濤歛濫翻黿頭羣峰壓不住海上浮來雲外露
長松落落鎖翠煙前邨後邨盡寒雨小橋駕壑無人行
雨溪流水經石砵亂樹深中更緜邈五城縹緲飛朱甍
此君北斗司喉舌妙手場中誇藝絕規模董李神更豪

素練雲煙欲明滅中堂忽生太古色
滉漾交迴渺難測
安得人間有此幽曠可冥搜
吾將誅茅結屋終老長松側

高房山小畫

明 傅汝舟

春山冥冥氣欲滴古絹元代標房山
空亭盡與惡木離
恍有仙客遊其間吾鄉漫仕早學此
筆意迴入房山裏
晴天簡點更摩挲滿堂煙霧來無何

題高房山山水

明 吳寬

燕南戲翠維房山高公昔者生其間戲拈畫筆少明豁
玉女峰亞垂煙鬟積雨初收隔春樹望見人家鴈邊住
亦知中有王維詩行到水窮無覓處

題高房山橫軸

明文徵明

春雲離離浮紙膚翠攢百疊山模糊山空雲斷得流水
咫尺萬里開江湖依然灌莽帶茅屋亦復斷渚迷菰蒲
岡巒出沒互隱見明晦陰晴日千變平生未省識匡廬
玉削芙蓉正當面宛轉香鑪霏紫煙依稀夢澤分秋練

未遂扁舟夢裏遊
酒醒獨展燈前卷
問誰能事奪天工
前元畫史推高公
已應氣槩吞北苑
未合胸次饒南宮
南宮已矣北苑死
百年惟有房山耳
祇今遺墨已無多
窗前把卷重摩挲
世間吮筆爭么麼
埽滅畦徑奈爾高
公何

題畫山水似盛子昭

四首

元黃玠

冉冉山上雲
累累水中石
稍稍林莽高
黯黯崖谷黑
東岡特秀絕
拔地起千尺
突兀衆峰間
猶是太古色

連山根插江江碧石齒齒層巔高出雲老樹下壓水巖
扉俯深迴磴道陟紆委欲持一壺酒慰彼幽棲子

前山如立梢後山如倚較遠近千萬山斗絕入牛角砦
頭積磊砢石面鬬礪确是中無征徭民俗猶原慙

回峰危欲墮峭徑深可入縈紆度壁隴窈窕去井邑泉
懸淨練明崖擁積鐵澀緬懷貞白君相從負雲笈

題韓介石所藏盛子昭畫

元黃玠

隆隆大谷深挺挺嘉木秀崇岡折陰壑懸水落長雷槎

牙松顛迴側塞石角鬪來者豈阮生尚爾冠服舊清嘯
滿空山高人在危構胡不從之居分瓢飲雲竇

題盛子昭畫

明 貝瓊

石轉交流水山浮欲動雲名園鄭谷迴絕境輞川分老
樹龍初化仙人鶴不羣已臨吳道子不數李將軍

題盛懋畫

明 郭鈺

遠鳥映微紅疎林帶寒綠石上一柴關溪邊兩茆屋輕
風花落地細雨雲歸谷側耳試閒聽疑聞紫芝曲

題盛叔章畫

元 鄭 洪

記得天台鴈宕歸滿山松露濕人衣十年眼底無林壑
今日畫圖看翠微

盛叔章山水畫

元 王 璋

草堂只在南湖上山色水光相與清鷗鳥不來魚不起
落花風颺讀書聲

盛叔章山水畫

元 楊維禎

春波門前水如酒十里竹西歌吹迴蓮葉筍深香霧卷

桃花扇小綵雲開九朵芙蓉當面立一雙鸛鵲近人來
老夫於此興不淺玉簫時吹鷓鴣濫堆

盛叔章畫

明 鮑 恂

煙濕空林翠靄飄渚花汀草共蕭蕭仙家應在雲深處
祇許人間到石橋

題倪雲林畫

有序

元 錢惟善

曲江老人喜雲林之畫與詩不徒作蓋識其人之賢
故次其韻以發清賞

太丘遺澤被諸孫東蔡深居雨外村濁水摩尼因見地
好山罨畫正當門得錢贖買書千卷留客時沽酒一尊
名利區區等春夢貪夫未覺古槐根

題元鎮畫

二首

元郊 韶

斷靄生春樹微茫隔遠汀梁谿新月上照見惠山青
高江新水生微月流雲度美人胡不知相思隔春樹

倪元鎮畫

元郊 韶

玄館夏初度青林暑氣中開軒對流水坐石待薰風花

落葛中側鳥鳴山几空經鉏者誰子散髮奏絲桐

倪雲林為靜遠畫

元黃公望

遙山近山青欲滴大木小木葉已疎斜日疎篁無鳥雀
一灣溪水數函書

和雲林題畫

元鄭元祐

肯從九龍隱來住百花莊江上春樹碧山中秋草黃放
情揮翰墨習靜愛林塘莫道成樗散終期作棟梁

雲林小景

元鄭元祐

雲起野橋西層峰翠隔溪欲尋清閼閣古木楔簷低

題雲林小景圖

元倪瓚

赤城霞暝神芝秀洞裏桃花不記春何事却將山水脚
鐘陵市上踏紅塵

次韻雲林畫

元華幼武

山光澹澹樹陰陰溪水湯湯漱玉琴此境不知何處有
清風吹起鹿門心

為吳子道題雲林畫

元華幼武

萬里乾坤一草亭
吳山相對越山青
祇憐脩竹最深處
佳客長留醉不醒

雲林畫山水竹石

元華幼武

秋雲無影樹無聲
湛湛長江鏡面平
遠岫煙銷明月上
小亭危坐看潮生

題倪雲林畫

次倪韻

明李東陽

江雲亂人目
江水綠人衣
苔雨疑將濕
林風聽漸稀
吳儂歌竹送
越客采菱歸
不見滄洲老
垂楊拂舊磯

倪雲林畫

明卞同

雲開見山高木落知風勁亭下不逢人斜陽澹秋影

題雲林小景

明高啓

歸人渡水少空林掩煙舍獨立望秋山鐘鳴夕陽下

題倪雲林畫

明俞貞木

棲神山下玄元館華表巍然鶴未歸寂寂小亭人不見
夕陽雲影共依依

雲林畫

明王燧

羣樹葉初下千山雲半收空亭門不掩禁得幾多秋

題倪元鎮小畫

明施漸

片石叢篁豈在多丹青只論意如何若能咫尺看千里
即是瀟湘壁上過

題仿雲林筆意

明李日華

木葉蕭疎煙靄濃層層千嶂削芙蓉詩人好句從何得
只在波光樹影中

題仿倪迂畫

明董其昌

迂翁高卧九龍雲清悶風流海外聞雪後江山青似染
拈來却勝李將軍

題倪雲林小幅山水

明僧元璞

雲林隱者絕風流常到澗西山寺遊下馬脫巾青竹裏
題詩寫畫野泉頭房山墨法誰能得謝朓襟懷自可侔
便儼梁溪一相覓桃花春水隔芳洲

題曹雲西畫

元倪瓚

吳松江水碧於藍怪石喬柯在渚南鼓柁長吟採蘋去

新晴風日更清酣

題曹雲西山水

元 王冕

旭日耀蒼巖翠嵐生嫩寒幽人詩夢醒清響得松湍

題雲西畫卷

元 吳鎮

雲西老人清且奇隨意點筆自合詩高尚不趨車轍迹
新圖不讓虎頭癡溪中有人空佇立江上征帆歸去遲
何處溪歌聲欸乃碧雲疎樹晚離離

曹雲西山水

明 王遠

世治多福人時危多貴人貴人乃鬼撲福人真天民緬
憶曹雲西生死太平辰高秋下孤鶴想見英風神苑苑
露擗間幽幽水石濱漿打甫里船角塾林宗巾往訪趙
松雪滿載九峰春斯圖作何年援筆為嘅呻池廢餘野
鵠井漑搖青巖

題唐子華山水

末句用楊
廌夫五字

元 郊 韶

我愛會稽楊使君洞庭秋月約平分時時吹笛中流去
卧看蒼山如畫雲

題唐子華畫山水

明僧復初

江雲如雪樹高低竹裏人家傍水西
滿地松陰春雨過
好山青似若邪溪



御定歷代題畫詩類卷十二